



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Edisaun : 8 Jullu 2010

JSMP Rekomenda ba Primeiru Minístru Australia atu respeita ba Konstituisaun Timor Léste

JSMP rekomenda ba Primeiru Minístru Australia, Julia Gillard, atu respeita ba Konstituisaun Timor Léste wainhira halo negosiasaun relasionadu ho asuntu refere ba estabesimentu sentru iha Timor Léste ba ema ne'ebé buka aziliu. JSMP hasai estetmentu ne'e hanesan resposta ida ba anunsiu husi PM Gillard iha Tersa Feira liu bá, depois halo konsultasaun ho Prezidente Jose Manuel Ramos Horta, katak Australia iha planu atu haruka ema ne'ebé buka aziliu iha Australia ba Timor Léste hodi halo prosesa legal ba sira.

Tuir Luis de Oliveira Sampaio, Direitór Ezekutivu JSMP katak, “konabá ne'e klaru iha Artigu 115 Konstituisaun Repúblika katak poder atu hala'o politika geral ba nasaun nian iha governu nia liman, wainhira hetan aprovasaun husi Parlamentu Nasional, la'os iha Prezidente nia liman”.

Luis de Oliveira Sampaio akresenta tan katak “nune'é Prezidente Repúblika iha poder ne'ebé ki'ik relasionadu ho relasaun estrangeiru, poder ne'e maior parte simbóliku deit. Nia sei la hetan lisensa atu bele involve iha negosiasaun jeral konabá relasaun ho estrangeiru no polítika jeral sen iha konsultasaun ho Governu ka Parlamentu Nasional”.

JSMP hanoin katak importante tebes ba governu iha rai seluk atu bele respeita ba kolokasaun poder ne'ebé define ona iha Konstitusaun Timor Léste, tanbá orgaun sira iha Timor Léste sei nurak no iha istoria la diak tanbá iha funsionariu ka ofisial públiku halo aksaun sai husi ninia poder ne'ebé define ona ba sira iha Lei ne'ebé vigora ona.

JSMP mos fiar katak proposta atu hari'i sentru ba ema ne'ebé buka ba aziliu iha Timor léste, governu la bele aseita sé la konsidera impaktu proposta ne'e ba sistema judisiariu iha Timor léste, ne'ebé oras ne'e dau-daun sei frazil no iha prosesu dezvoltamentu nia laran.

JSMP lamenta katak sentru aziliu wainhira deside ona, Timor Léste bele hetan difikuldades atu bele kumpri ninia dever rasik hanesan estadu ne'ebé ratifika ona konabá Kovensaun ba Refugiadus ninian.

Atu hetan informasaun kle'an favor kontaktu:

Luis de Oliveira Sampaio

Direitór Ezekutivu JSMP

Email: luis@jsmp.minihub.org

Landline: 3323883